

五礼通考

第六
卷九
册

五禮通考卷第一百四十三

內廷集

禮部侍郎金匱秦蕙編輯

兩淮都轉鹽運使德永盧曾

參校

李天保總督都御史方觀承司訂

直隸按察司副使元和宋崇元

嘉禮十六

飲食禮

蕙田案周禮大宗伯以嘉禮親萬民以飲食之禮親宗族兄弟大傳云上治祖禰尊尊也下治子孫親親也旁治昆弟合族以食序以昭穆別之以禮義人道竭矣小記曰親親以三爲五以五爲九上殺下殺旁殺而親畢矣坊記曰君子因睦以合族嗚呼此堯之所以克明俊德以親九族九族既睦平章百姓者也周之盛也內睦九族外尊事黃耆則有常

棣行葦之詩及其衰也葛藟頌弁角弓杕杜
刺焉先王之於宗族兄弟也親睦之因而燕
樂之故有族燕之禮有族飫之禮文王世子
若公與族燕則異姓爲賓膳宰爲主人公與
父兄齒族食世降一等周語王公立飫則有
房烝親戚燕饗則有餽烝飫以顯物宴以合
好夫曰燕曰飫皆所謂飲食之禮也陳氏禮
書云古者合族之禮方其平居無事則有燕
以申好及其有大疑謀則有飫以圖事燕則
脫履升堂坐而不立其牲體折節而餽烝所
以致愛飫不脫履升堂立而不坐其牲半解
而房烝所以致嚴致愛致嚴其禮盛矣然燕
之禮又有二有時燕有因祭而燕詩常棣儉

爾邊豆飲酒之飫兄弟既具和樂且孺湛露
厭厭夜飲在宗載考周語時燕不淫此時燕
也詩楚茨諸父兄弟備言燕私既醉既飽小
大稽首行葦戚戚兄弟莫遠具邇曾孫維主
酒醴維醕坊記因其酒肉聚其宗族此因祭
而燕也禮書云其禮之詳雖不可考要之服
皮弁服卽於路寢宰夫爲主異姓爲賓王與
族人燕于堂后率內宗之屬燕于房其物餽
烝所以合好也其食世降一等所以辨親疏
也昭穆以敘之所以明世次也夜飲以成之
所以別異姓也若夫几席之位升降之儀脫
屣而坐立監相視羞庶羞以盡愛爵樂無算
以盡歡其大率與諸侯燕禮不異蓋先王之

禮以孝弟治天下而孝弟莫始於親親親親之心無所不至則飲食之禮隆焉且不特天子諸侯而已儀禮特牲祝告利成徹庶羞設于西序下鄭康成註引書傳曰宗室有事族人皆侍終日大宗已侍于賓奠然後燕私燕私者何也祭已而與族人飲此徹庶羞置西序下者爲將以燕飲與書傳云不醉而出是不親也醉而不出是渫宗也出而不止是不忠也親而甚敬忠而不倦若是則兄弟之道備故曰君子篤於親則民興於仁此物此志也夫大宗伯敘爲嘉禮第一通典通解通考皆莫詳今從周禮之次序於昏冠之上而九族三族錫姓命氏天子睦族宗子收族立後

之法以類附焉觀於此者孝弟之心可以油然而生矣

觀承案儀禮有公食大夫禮有鄉飲酒禮有燕禮鄉飲酒與燕其牲皆狗然骨體致敬庶饒盡愛亦可云食而曰飲者有舉有薦薦爲舉設故曰飲也公食大夫其牲則牢其儀則具饌于東房而無尊雖酒亦實于觶加于豐而賓引奠于薦右而不飲其後有卒食之文而無卒爵之文故曰食禮食與飲之分各有其具者如此至王之食禮九舉公侯之食禮七舉王燕飲酒膳夫爲獻主公侯燕飲酒宰夫爲獻主是其等威之辨也而周禮酒人共賓客之禮酒飲酒而奉之注曰禮酒燕饗之

酒飲酒食之酒曲禮之酒漿處右卽食酒所
謂醕也又酒正有三酒四飲之辨三酒事酒
昔酒以飲清酒以祭四飲清醫漿醕皆以共
食清卽醕也凡醕啐而不飲故冠昏饗食之
禮皆設醕而不酬酢閒有酢者亦啐之而已
此更飲與食所分之明證也夫饗禮鄭氏以
爲無正文然體薦餽烝立以卒事其文具在
由是推之則族飫之禮其卽饗禮乎族食其
卽食禮乎族燕之有賓主固卽燕禮而又曰
族飲者亦卽賓主以爲言曰族燕不卽賓主
以爲言曰族飲非二禮也若公與族之私飲
酒是固有私飲時或卽詩與書傳所言燕私
謂燕卽族燕而以私爲厚解如君之私于寡

君人人以爲孟嘗私已者似燕與私爲一事
尚覺未安何也燕不可混于私也周禮膳夫
凡王之稍事設薦脯注云稍事是小事與臣
飲酒大事則有燕饗也故止設薦脯若此則
王與族人圖大事設族飫其小事則私飲酒
是在外臣有稍事之飲而在宗族卽謂之私
飲酒然則禮于異姓有饗有食有燕飲有稍
事之飲而在同姓則有族飫族食族燕飲以
及私飲酒之儀相配以成文于以見王道公
私之無閒禮文雖缺義可互參因此通彼歷
歷皆可遍觀而盡識也

周禮大宗伯以飲食之禮親宗族兄弟

注親者使之相親人君有食宗族飲酒之禮所

以親之也文王世子曰族食世降一等大傳曰繫之以姓而弗別綴之以食而弗殊百世而昏姻不通者周道然也

疏此經云飲食亦尊卑通有下文別有饗燕

則經云飲者非饗燕是私飲酒法其食可以通燕食俱有其下不別云食故也注引文王世子據人君法引大傳據大夫士法則萬民亦有此飲食之禮也

蕙田案注分飲食解雖細私飲酒謂在路寢不在庭卽所謂族燕族飫是也與下饗燕自有別

禮記大傳上治祖禰尊尊也下治子孫親親也旁治昆弟合族以食序以昭繆別之以禮義人道竭矣注治猶正也繆讀爲繆

疏旁治昆弟之時合會族人以食之禮

陳氏祥道曰飲食者人情之合歡者也觀文王燕兄弟而棠棣之美作幽王不能宴樂同姓而頍弁之刺興則合族以食禮之大者也禮曰君與族人燕則膳宰爲主人又曰族食世降一等詩曰厭厭夜飲在宗載考國語曰親戚饗宴有餽烝又曰歲飫不倦時宴不淫則族食之禮合之以時等之以世掌之以膳夫其薦也以餽烝其飲也或以夜不特如此而已序以昭繆別以禮義則尊者安于爲尊卑者安于爲卑然後孝慈友恭油然而生於其閒人道不竭于此矣乎蓋合族以食恩也昭繆禮義所以節恩者也無恩則離恩而無以節之則亂先王之於宗族使不至於離且亂無他盡人道以治之而已汪氏克寬曰合族以食使之有所同而尊卑之禮一序以昭繆使之有所異而親疏之義明如此則皆有禮義之別而人之道盡於此矣

同姓從宗合族屬異姓主名治際會

注合謂合之宗子之家序昭繆也異姓謂來嫁者也

主於母與婦之名耳際會昏姻交接之會也（疏同姓從宗者同姓父族也從宗謂從大小宗也合族屬者謂合聚族人親疏使昭爲一行穆爲一行同時食故曰合族屬也）

繫之以姓而弗別綴之以食而弗殊

（疏綴之以食而弗殊者連綴族人以飲食之禮而不

殊異也

陳氏祥道曰以飲食之禮親宗族兄弟所謂綴之以食也

君有合族之道族人不得以其戚戚君位也

（疏合族者言設族食燕飲有會

合族人之道

陳氏祥道曰君之於族人主乎愛族人之于君主乎敬故有合族之道所以明其親親之恩不得以其戚戚君位所以明其尊尊之義不能親睦九族燕樂同姓與夫恃親而不

恭者豈知此哉

呂氏祖謙曰君有合族之道如詩所謂飲食燕樂同姓是也

右飲食通義

父王世子若公與族燕則異姓爲賓膳宰爲主人公與父兄齒族食世降一等

（注異姓爲賓謂同宗無相賓客之道膳宰爲主人君尊不獻酒也與父兄齒親親也族食世降

一等親者稠疎者稀〔疏〕明公與族人燕食之禮燕飲必立賓以行禮異姓爲賓必對主人君尊不宜敵賓故使供膳之宰以爲主人使得抗禮酬酢也公旣不爲主族人又不爲賓故與族人相齒見親親也族食謂與族人燕食也族人旣有親疏燕食亦隨世降殺假令本是齊衰一年四會食若大功則一年三會食小功則一年二會食總麻則一年一會食是世降一等也

觀承案族食世降一等則至總麻其降已窮綴食之屬疏同姓也不在此列明矣月令大合吹注云與族人大飲作樂於大寢以綴恩疏引綴食以釋綴恩之義似卽指此爲綴食之時而其釋族人也又曰三族依然世降一等之族未及同姓又云食常無樂明此爲飲禮而非食禮也明堂禮季冬命國爲酒以合族亦然大率禮之言族皆九族不及同姓詩傳之言宴樂同姓多與族混不可爲典要惟大傳言同姓與族之分最明其曰同姓從宗

合族屬注云合之宗子之家序昭穆也其釋
合也曰同食蓋先王慮恩之殫於遠也命以
百世不遷之宗則同姓之屬卽有百世相宗
之誼從宗合族卽所謂綴食弗殊也意自相
承似不必別爲附會

公與族燕則以齒而孝弟之道達矣其族食世降一等

親親之殺也

注與族燕則以齒以至尊不自異於親之列殺差也疏公所
以降已尊而與族人燕會齒列是欲使孝弟之道通達于下也

民有親屬者豈得相背棄哉
每世而降一等是親親之殺

陳氏澂曰族人雖眾其初一人之身也豈可以賓客之道外之故以異姓爲賓
而使膳宰爲主與之抗禮酬酢君尊而賓不敢敵也君雖尊而與父兄列位序
尊卑之齒者篤親親之道也族食與族人燕食也世
降一等謂族人既有親疏則燕食亦隨世降殺也

方氏慤曰凡燕之禮必立賓以備酬酢之儀然主人者尊賓既謂之賓則尊之
而已非親之也親莫親于同姓則凡于同姓固無賓之之禮也故燕族之賓不
以同姓而以
異姓爲之也

蕙田案此君與族人飲食之禮曰族燕曰族

食燕之禮多食之禮殺也燕有樂而食常無

樂

月令季冬之月命樂師大合吹而罷

注歲將終與族人大飲作樂于大寢以綴恩也言罷

者此用禮樂於族人最盛後年若時乃復然也凡用樂必有禮用禮則有不用樂者王居明堂禮季冬命國爲酒以合三族君子說小人樂疏與族人大飲者以王居明堂禮云季冬命國爲酒以合三族故知與族人飲也云作樂於大寢者以其命樂師合吹故知作樂也大寢則路寢也與宗人圖事之處既飲族人故知於大寢云以綴恩者綴謂連綴恩謂恩親大傳云繫之以姓而弗別綴之以食而弗殊云罷者此用禮樂於族人最盛後年季冬乃復如此作樂以一年停頓故云罷大合吹必富有禮與族人燕飲今惟云命樂師故云用樂必有禮而食常無樂故云禮有不用樂也引明堂禮以合三族者三族父子及身則小記云親親以三爲五以五爲九是也君子說謂卿大夫士小人樂謂凡庶也

蕙田案此宗族燕食之時與樂也

逸禮王居明堂禮季冬命國爲酒以合三族

汪氏克寬曰孝弟莫始於親親則燕之禮不得而廢設其器備其物辨其數立其文莫尊乎君也不以位加于父兄燕序必以齒達乎孝弟之道也莫親乎同好也不可以無殺燕則族人世降一等焉凡燕之禮必主賓以備酬酢而族燕之賓主則異姓與膳宰爲之者篤親親之道也夫飲食口腹之欲也而必節之以禮則驕奢淫佚平而無過也歌舞耳目之欲也而必和之以樂則言動指遜易而無乖也莫不由親以篤乎恩有恩以著乎愛有愛以盡其禮焉

詩小雅常棣序常棣燕兄弟也

詩王者以兄弟至親宜加恩惠以時燕而樂之周公述其事而作

此詩爲兄弟者共父之親推而廣之同姓同族皆是也

常棣之華鄂不韡韡凡今之人莫如兄弟

箋承華者曰鄂不當作拊拊鄂足也

鄂足得華之光明則韡韡然盛喻弟以敬事兄兄以榮覆弟恩義之顯亦韡韡然

傳聞常棣之言爲今也

箋聞常棣之言始聞常棣華鄂之說也如此則人之恩親無如兄弟之最厚

何氏楷曰常棣與唐棣異木爾雅云唐棣移常棣棣案此則惟常棣得以棣名

程子云今玉李也華鄂相承甚力陸氏曰江南呼爲麥李一跗輒生二萼兩兩

相麗如垂絲海棠陸佃云移從移棣從棣唐棣之華反而後合常棣韡鄂上承

下覆甚相親爾從棣言華萼相承輝榮相束也束仁也移義也兄弟尚親親仁

也故常棣以燕兄弟宋祁云世人多誤以唐棣爲常棣於兄弟用之唐棣移也

移開而反合者也此兩物不相親鄂當作萼曹憲云花苞也唐明皇以華萼交

輝名樓正

取此詩義

詩緝嚴氏榮曰玉李其華繁密其鄂豈不韡韡光明乎華以覆萼萼以承華華

萼相承覆而光明猶兄弟相承覆而榮顯也凡今之人與我交接者皆莫如兄

弟之至親也凡今之人總言下文朋友妻子也一章發端姑言兄弟之常而辭氣抑揚之間已有感歎不盡之意其斯周公之心乎

死喪之威兄弟孔懷原隰裒矣兄弟求矣

詩緝嚴氏榮曰一章以華萼相輝喻兄弟之求顯姑以安樂之時言之既而斷以凡人皆不如兄弟則安樂之時未足以見其情之切至於是二章以下皆以

死喪急難之事驗之死喪可畏怖之事他人未必相念維兄弟甚相思念也方困窮流離羣聚於原野之時維兄弟則相求以相依也

朱子詩傳言死喪之禍他人所畏惡惟兄弟爲相恤耳至于積尸哀聚於原野之間亦惟兄弟爲相求也

蕙田案孔懷謂兄弟之患難相恤爲可念卽

下句所言是也朱子說最爲緊切

何氏楷曰此就常情而言上章所謂莫如兄弟者於此驗之最爲親切

脊令在原兄弟急難每有良朋況也永歎

朱子詩傳脊令離渠水鳥也脊令飛則鳴行則搖有急難之意故以起興而言當此之時雖有良朋不過爲之長歎息而已力或不能相及也

呂氏祖謙曰疎其所親而親其所疎此失其本心者也故此詩反覆言朋友之不如兄弟蓋示之以親疎之分使之反循其本也本心既得則由親及疎秩然有敘兄弟之親既篤朋友之義亦敦矣初非薄於朋友也苟雜施而不孫雖曰厚於朋友知無源之水朝滿夕除胡可保哉

何氏楷曰禽經云脊令友悌張華注云脊令其母者飛鳴不相離故所以喻兄弟兄弟急難者言兄弟相急於患難謂相救也春秋傳急病讓夷戰國策以公

子高義能急人之困字法本此

蕙田案此前後三章最情理之實非親歷者不能道亦不能知也非至聖烏能體貼至此

兄弟鬩于牆外禦其務每有良朋烝也無戎

詩緝嚴氏祭曰兄弟或不相得鬩于牆內非令兄弟也然有他人來侵侮之則同心以外禦為務不以小忿而敗親也良朋雖眾然無相助者言兄弟之不容者猶勝朋友之良者也

輔氏廣曰二章至四章兄弟真切

之情惟於此際而後得見分曉

張氏敘曰二章正言兄弟休戚之相關三章四章又以朋友相較而徵其莫如也脊令水鳥在原則失所故與急難況通雖情不甯徒付之長歎而已不能身與其難也烝盛氣貌戎兵也雖憤於橫逆而無不反兵之理則亦無能與戎以禦之也急難者好兄弟也鬩牆者惡兄弟也兄弟不論好惡而皆勝於朋友謂之良朋亦非朋友之簿也義台之分止如是爾雖急難死生之際固有可託以濟者然非常也曰每者則義亦不相礙矣

喪亂既平既安且甯雖有兄弟不如友生

詩緝嚴氏祭曰情義之輕重當於死生患難之時觀之若喪亂既平安甯無事之時則以為兄弟不如友生矣何不於死喪患難之時以觀之乎

賓爾籩豆飲酒之飫兄弟既具和樂且孺

傳賓饌飫私也不脫屢升堂謂之飫九族

會曰和孺屬也王與親戚燕則尚毛（箋）私者圖非常之事若議大疑於堂則有
飫禮焉聽朝爲公九族從已上至高祖下及元孫之親也屬者以昭穆相次序
疏此章言王者親宗族也王有大疑非常之事與宗族私議而圖之其時則陳列
爾王之遵豆爲飲酒之飫禮以聚兄弟宗族爲好焉爲此飫及燕禮之時兄弟既
已具集矣九族會聚和而甚欣樂且復骨肉相親屬也言由王親宗族故宗族亦
自相親也飫私釋言文孫炎曰飫非公朝私飲酒也周語有王公立飫又曰立成
禮燕而已飫既爲私不在公朝在路門內也酒肉所陳不宜在庭則在堂矣燕禮
云皆脫屣乃升堂少儀云堂上無跣燕則有之是燕由坐而脫屣明飫立則不脫
矣故云不脫屣升堂謂之飫箋解飫爲私之意以私在路寢堂上故謂之私若聽
朝則爲公事對公故言私也知飫禮爲圖非常議大疑者以周語云王公之有飫
禮將以講事成禮建大德昭大物言講事昭物是有所謀矣明圖非常議大疑而
爲飫禮也周語曰王公立飫則有房烝親戚燕饗則有餽烝又曰飫以顯物燕以
合好則飫燕禮異序曰燕兄弟此陳飫者圖非常議大疑乃有飫禮則飫大於燕
燕亦是王於族親之禮故陳之示親親也飫禮議其大疑則婦人不與立以成禮
則不必和樂下章云妻子好合此傳曰王與族人燕則向毛以此詩飫燕雜陳故
下箋云王與族人燕則宗婦內宗之屬亦從后於房中是此章之中兼燕禮矣上
二句爲飫下二句爲燕飫陳邊豆燕兄弟互以相兼也孺屬釋言文李巡曰孺
骨肉相親屬也中庸曰燕毛所以序齒文王世子曰公與族人燕則以齒而孝弟
之道達矣王與宗族人燕以毛髮年齒爲次第也司儀曰王燕則諸侯毛亦謂同
姓諸侯也故彼注云謂以髮鬢爲坐朝事尊尊尚爵燕則親親尚齒云親親是燕
同姓
明矣

妻子好合如鼓瑟琴兄弟既翕和樂且湛

（箋）好合志意合也合者如鼓瑟琴之聲相

應和也王與族人燕則宗婦內宗之屬亦從后於房中（疏）上章並陳飫燕之禮此又論內外之歡也王與族人燕於堂上則后與宗婦燕於房中王之族人見王